

ԱԶԴԱՐԱՐ

ՏԵՐԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Թ. Տարի, Թիւ 371, Ուրբաթ, 10 ՓԵՏՐՈՒԱՐ, 2017

ՀԱՄԱՅՆՔԱՅԻՆ

ՀՅՐ Քուէյթի ՔԵՄ-ի եւ ՀՐԱՅՐ ԴԺՈՒՔ ՊՄ «ԳԱՐԵԳԻՆ ՆԺՊԵՆ» Բանակումը՝ Յանձնառու եւ Ազգանուէր Երիտասարդը Պատրաստելու Միջոց

ՀՅՐ Քուէյթի Քրիստափոր երիտասարդական միութեան եւ Հրայր Դժոխք Պատանեկան



միութեան Վարիչ կազմի կազմակերպած «Գարեգին Նժոյն» երկօրեայ բանակումը սկիզբ առաւ Հինգշաբթի, 02 Յունուար 2017-ին: Բանակումին մասնակցեցան շուրջ 60 բանակողներ: Բանակումին ծրագիրը կ'ընդգրկէր դաստիարակչական օրակարգեր՝ զրոյց, դասախօսութիւն, զարգացման մրցում, ինչպէս նաեւ մարզական ու մարտական այլազան օրակարգեր: 48 ժամերու ընթացքին բանակողները օժտուեցան տարբեր բնոյթի գիտելիքներով, որոնց բոլորին նպատակն էր դաշնակցական երիտասարդին մօտ հաստատել հայրենիքին նկատմամբ անսակարկ նուիրումի սկզբունքը եւ յաւելեան պատասխանատուութիւն ստանձնել ու անխոնջ պայքար տանիլ Հայ Դատի աշխատանքներուն մէջ:

Բանակումի ընթացքին բանակողներուն այցելեց ՀՀ Ազգային Ժողովի ՀՅՐ խմբակի անցելի պատգամաւորներէն ընկի. Լիլիթ Գալստեան: Ան դասախօսութեան մը ընդմէջէն ներկայացուց Հայ յեղափոխական դաշնակցութեան վերջին 25-ամեայ

գործունեությունը՝ շեշտը դնելով հայության անսահման կարիքներուն հասնելու դաշնակցական մարդու եւ յատկապէս երիտասարդի միշտ պատրաստ ըլլալու անհրաժեշտութեան վրայ, հայրենիքին թէ սփիւռքի տարբեր շրջաններուն մէջ:

Նաեւ այցելեց Թեմիս բարեջան առաջնորդ Տ Մասիս Ծ. Վրդ. Զօպույեան ու իր հայրական օրհնությունը փոխանցելէ ետք բոլորին ներկայացուց Ազգային Հերոս Գարեգին Նժդեհի կեանքն ու սխրանքները:

Բանակումի երկրորդ օրը ճոխ էր դաստիարակչական ծրագիրով, որ կ'ընգրկէր, զրոյց՝ «ՀՅԴ երետասարդականի տեսլականը Հայաստանի եւ միջին արեւելքի մէջ», այս զրոյցի ընթացքին հնչեցին բազմազան մտքեր, որոնց ամփոփումը պիտի ներկայացուի



յառաջիկային ԹԵՀԱՐՆԻ խորհրդատողովի ընթացքին: Անոր յաջորդեց WOKSHOP մը, իսկ կէսօրէ ետք կլոր սեղան մը, «Դաշնակցական երիտասարդին դիմագրաւած մարտահրաւերները» խորագրով: Օրուան ընթացքին ընկերները լսեցին ՀՅԴ պատմութենէն դրուաքներ, որոնք ներշնչման յորդարատ աղբիւրներ են միշտ, իսկ յաջորդ օրը յատուկ հարց-պատասխանի մրցոյթով մը իրենց ստացած գիտելիքները ի գործ դրին:

Մասնակից բանակողները կարգապահութեամբ եւ լրջութեամբ հետեւեցան բոլոր օրակարգերուն: Բանակումը վերջ գտաւ Շաբաթ, 04 Յունուար 2017-ին, կէսօրէ ետք ժամը 4:00-ին: Աւարտին Քուէյթի Քրիստափոր Երիտասարդական միութեան անդամները մեկնեցան ԱԼՄԱՅԱՏԻՆ նշանառութեան ու նետաձգութեան կենդրոն ու ծանօթացան զինավարժութեան կանոններուն, ապա ատրճանակի նշանառութեան գործնական փորձեր կատարեցին:

Դաշնակցական երիտասարդները ներշնչուած եւ բարձր տրամադրութեամբ վերադարձան իրենց տուները՝ անգամ մը եւս վերանորոգելով հայրենիքին ծառայելու իրենց անսակարկ ուխտը:

ՅԱՅՏԱՐԱՐՈՒԹԻՒՆ

Հովանաւորութեամբ
Գերպ. Տ. Մասիս Ծ. Վրդ. Զօպույեանի
Կազմակերպութեամբ
ՀՅԴ ՔՔԵՄԻ ԵՒ ՀԴ Պատանեական միութիաններու

ՅԻՇԱՏԱԿԻ ԵՐԵԿՈՅ ՆՈՒԻՐՈՒԱԾ ՓԵՏՐՈՒԱՐԵԱՆ ԱՊՍՏԱՄԲՈՒԹԵԱՆ 96-րդ Ամեակին

*Տեղի պիտի ունենայ Ուրբաթ, 17 Փետրուար 2017-ին, Քուէյթի
Ազգային Վարժարանէն ներս, երեկոյեան ժամը 7:00-ին:
Երեկոյի ընթացքին տեղի պիտի ունենայ շրջաւարտ
պատանիներու երդման արարողութիւն:*

**Կ'ուզենք բոլորին ուշադրութեան յանձնել
մուտքը ազատ է:**

ՔԱՂՅՐ ՆՈՒԻՐԱՏՈՒՈՒԹԵԱՄԲ ՁԵՐՄԱՑՆԵՆՔ ՄԵՐ ԶԻՆՈՒՈՐԸ



Կազմակերպութեամբ Քուէյթի ՀՕՄԻ մեկուսի մասնաճիւղի վարչութեան եւ Քուէյթի Ազգային վարժարանին, Հինգշաբթի, 2 Փետրուարի առաւօտուն վարժարանէս ներս տեղի ունեցաւ յատուկ հանգանակութիւն՝ «ՔԱՂՅՐ ՆՈՒԻՐԱՏՈՒՈՒԹԵԱՄԲ ՁԵՐՄԱՑՆԵՆՔ ՄԵՐ ԶԻՆՈՒՈՐԸ» խորագրով:

Հանգանակութեան ամբողջ հասոյթը պիտի տրամադրուի Հայաստանի զինուորներուն ոտքերու ջերուցման սարքեր ապահովելու համար:

Կեցցէ՛ հայ զինուորը, կեցցէ՛ն հայրենասէր աշակերտները:

ՀԱՅԿԱԿԱՆ

Կիրո Մանոյեան. «Ասիկա Պիելոռուսիոյ Կողմէ Հակահայ Մեղսակցութեան Շարունակութիւնն Է»

ՀՅԴ Բիւրոյի անդամ, ՀՅԴ Բիւրոյի Հայ դատի եւ քաղաքական հարցերու գրասենեակի պատասխանատու Կիրո Մանոյեան 8 Փետրուարին տուաւ մամլոյ ասուլիս մը, որուն ընթացքին անդրադարձաւ պլուկըր Ալեքսանտր Լափշինի Ագրպէյճանին արտայանձնման՝ հաստատելով, որ այս հարցին շուրջ աղմուկ պէտք է բարձրացնել միջազգային մակարդակի վրայ:

Լափշինի առնչութեամբ ան դիտել տուաւ, որ ուրիշ բան կարելի չէր ակնկալել Պիելոռուսիոյ Գերագոյն դատարանէն: «Ասիկա Պիելոռուսիան է ի վերջոյ: Չեմ կարծեր, թէ տարբեր որոշում կարելի էր ակնկալել», նշեց ան՝ աւելցնելով, որ ասիկա այդ երկրին կողմէ Ագրպէյճանի հետ հակահայ մեղսակցութեան շարունակութիւնն է, ինչ որ կարելի է տեսնել նաեւ ՀԱՊԿ-ի մէջ եւ ԱՊՀ-ի որոշ ժողովներուն:

Մանոյեանի համաձայն, կարելոր է, որ այս հարցը ճիշդ հանգուցալուծում ունենայ եւ կարելիութիւն ըլլայ, որ Լափշին դիմէ Մարդու իրաւունքներու եւրոպական դատարան՝ յուսալով, որ վերջինս այդ մէկը կ'ընէ:

Միւս կողմէ, ըստ ՀՅԴ Բիւրոյի անդամին, անհրաժեշտ է, որ այս հարցը բարօք լուծում ստանայ, որովհետեւ այս նախադէպը կրնայ վատ նախընթաց ըլլալ օտար լրագրողներու եւ նոյնիսկ քաղաքական գործիչներու համար, որոնք կը փափաքին այցելել Արցախ:

Մանոյեան նշեց, որ Հայաստան իբրեւ պետութիւն այնքան ալ շատ ընելիք չունի, քանի որ ենթական Հայաստանի քաղաքացի չէ, Լեռնային Ղարաբաղը Հայաստանի մէկ մասը չէ: Ըստ անոր, Հայաստան պէտք է պարզապէս փորձէ կարելի եղածին չափ արտայայտել իր անհանգստութիւնը, որ նման քայլերը ոչ մէկ ձեւով կը նպաստեն տագնապի խաղաղ լուծման:

Մանոյեան կարծիք յայտնեց, որ պէտք է ձայն բարձրացնեն մեր հասարակութիւնը եւ քաղաքական շրջանակները: «Հիմա պէտք է հաւասարութեան նշան դնել Ագրպէյճանի եւ Պիելոռուսիոյ միջեւ, որովհետեւ այս հարցին մէջ գոնէ, այդ երկուքը նոյնն են»: Ան նշեց, որ Հայաստանի խորհրդարանականները պէտք է բարձրացնեն այս հարցը խորհրդարանական տարբեր վեհաժողովներու մէջ, բայց անհրաժեշտ է նաեւ խրախուսել, որ դիմուի Մարդկային իրաւանց եւրոպական դատարան (ՄԻԵԴ) եւ աւելի աղմուկ բարձրացուի արտասահմանի մէջ:

Կիրո Մանոյեան կարելոր նկատեց, որ այս հարցին էութիւնը պարզուի, հասկնալու, թէ ի՛նչ ենթաշերտեր ունի անիկա: Արդարեւ, բազմաթիւ այլ օտար քաղաքացիներ այցելած են Արցախ եւ յայտնուած «սեւ ցանկ»-ին մէջ, սակայն անոնց նկատմամբ քրեական հետապնդում չէ յայտարարուած: Ան զարմանալի նկատեց այն, որ Պիելոռուսիա չի փորձեր արտայանձնման այլ պատճառներ ներկայացնել՝ բաւարարուելով Ագրպէյճանի ներկայացուցածով՝ Լափշինի Լեռնային Ղարաբաղ այցելութեամբ: «Այս պատճառաբանութիւնը խեղկատակութիւնն է, հետեւաբար պէտք է հակազդել: Ինչպէս զիտենք, ԵԱՀԿ-ի մամլոյ ազատութեան յանձնակատարը խօսած է այդ մասին՝ յայտնելով իր անհանգստութիւնը: Լաւ պիտի ըլլայ, որ մեր խորհրդարանականները բարձրացնէին այս հարցը: Անհրաժեշտ է աշխատանք տանիլ թէ՛ Ռուսիոյ, թէ՛ Իսրայէլի հասարակական հատուածին հետ», աւելցուց Մանոյեան:

Ան անդրադարձաւ նաեւ 7 Փետրուարի գիշերը եւ առհասարակ վերջին օրերուն Ագրպէճանի կողմէ դարաբաղեան-ագրպէճանական շփման գիծին մէջ լարուածութեան սրման՝ նշելով, որ այդ մէկը անսպասելի չէր. ամէն անգամ, երբ ԵԱՀԿ Մինսքի խմբակի համանախագահները խօսին Հայաստանի եւ Ագրպէճանի արտաքին գործոց նախարարներուն միջեւ հաւանական հանդիպումին մասին, Ագրպէճան կը սրէ կացութիւնը սահմանագիծին մէջ:

Մանոյեան նշեց, որ Մինսքի խմբակի համանախագահող երկիրներէն պէտք է պահանջել հասցեագրուած կոչեր ուղղել, եւ ոչ թէ անարդար ձեւով, ինչպէս անոնց վերջին յայտարարութիւնն էր, երբ Հայաստանէն դին յանձնելու գծով ակնկալութիւն ունէին, ուստի տուին Հայաստանի անունը: Հիմա ալ պէտք է իրենց պահանջը հասցեագրեն Ագրպէճանին: «Համանախագահող երկիրներէն պէտք է պահանջել համարժէք, յստակ, անուանական արձագանգ՝ ուղղուած Ագրպէճանի գործողութիւններուն: Միջնորդները սովորաբար հաւասարութեան նշան կը դնեն, որ կողմնակալ չթուին, սակայն կան դէպքեր, երբ իրերը պէտք է իրենց անունով կոչել», հաստատած է Մանոյեան:

Ան բացատրեց, որ Մինսքի խմբակը կը ձգտի անկողմնակալ երեւիլ: «Ասիկա տեղի կ'ունենայ ճիշդ այնպիսի փուլի, երբ Ալիեւ Պրիքսէլի մէջ իբրեւ թէ բանակցութիւններու սկսած է Եւրոպական Միութեան հետ: Այս բոլորը հաշուի առնելով՝ պէտք է շատ ուժեղ հակազդեցութիւն ցոյց տանք», ըսաւ ան:

ՀՅԴ Բիւրոյի անդամը խօսեցաւ նաեւ արցախեան տագնապի եւ Ցեղասպանութեան ճանաչման գծով Հայ դատի ծրագիրներուն մասին: «Արցախի հարցին առնչութեամբ կարեւոր քայլերու պիտի ձեռնարկեն Հայ դատի գրասենեակները՝ Միջին Արեւելքին կարելիութիւն տալով մօտէն ծանօթանալու Ղարաբաղին եւ Ղարաբաղի հարցին: Միացեալ Նահանգներու եւ Եւրոպայի պարագային պիտի փորձենք Արցախը արտաքին մեկուսացման քաղաքականութենէն դուրս բերել: Այդ ուղղութեամբ նախորդ տարիներուն արդէն որոշ ջանքեր գործադրուած են: Աւելցած են լրագրողներու եւ քաղաքական գործիչներու փոխադարձ այցելութիւնները», նշեց ան:

Ցեղասպանութեան ճանաչման վերաբերեալ Մանոյեան ըսաւ, թէ կը շարունակուի այն աշխատանքը, որ կը կատարուի վերջին տարիներուն, բայց առանց Ցեղասպանութեան ճանաչման գործընթացը կասեցնելու. շեշտը պիտի դրուի հատուցման հարցին վրայ եւ տարբեր քայլերով ցոյց պիտի տրուի թէ՛ աշխարհին, եւ թէ՛ Թուրքիոյ, որ Հայոց ցեղասպանութեան ճանաչումը, ի վերջոյ, նաեւ հատուցում կը նշանակէ:

Աղուան Վարդանեան Կոչ Կ'ուղղէ՝ Լափշինի Վերաբերող Ազգային Ժողովի Յայտարարութիւն Հրապարակելու

8 Փետրուարին գումարուած Ազգային ժողովի քառօրեայ նիստին պատգամաւորները իրենց բողոքի եւ քննադատական կեցուածքները դրսեւորած են պլոկըր Ալեքսանտր Լափշինի՝ Պիեւոռուսիոյ կողմէ Ագրպէճանին արտայանձնման դէմ:

Խօսք առած է նաեւ ՀՅԴ Հայաստանի Գերագոյն մարմինի ներկայացուցիչ, Ազգային ժողովի ՀՅԴ խմբակցութեան քարտուղար Աղուան Վարդանեան, որ նշած է. «Ժամանակը այնպէս է, որ բոցաշունչ ելոյթներով կարելի է զբաղիլ, բայց ես աւելի գործնական առաջարկ ունիմ: Նախ՝ տակաւին շաբաթներ առաջ, երբ խնդիրը առկայ էր, Դաշնակցութեան ուսանողական եւ երիտասարդական միութիւնները ցոյց մը կազմակերպեցին Պիեւոռուսիոյ դեսպանատան առջեւ: Անկէ ետք սփիւռքի մեր կառոյցները տասնեակ երկիրներու մէջ հանդիպումներ ունեցան եւ

ցոյցեր կատարեցին տարբեր երկիրներու մէջ գտնուող Պիելոռուսիոյ դեսպանատուններուն առջեւ: Բայց եւ այնպէս տեղի ունեցաւ արտայանձնումը: Եւ հիմա շատ աւելի գործնական պիտի ըլլայ, որ Ազգային ժողովը հանդէս գայ յայտարարութեամբ: Յանձնարարենք արտաքին յարաբերութիւններու յանձնախումբին՝ մշակել յայտարարութիւն մը, որուն մենք վաղը առաւօտեան պիտի քուէարկենք: Ասիկա պիտի ըլլայ արժանապատիւ պետութեան քաղաքական մարմինի դիրքորոշումը»:

Հայաստանի Քաղաքական Գործիչներ Եւ Իրաւապաշտպաններ Կ'արձագանգեն Լափշինի Արտայանձնման

Պիելոռուսիոյ կողմէ պլոկըր Ալեքսանտր Լափշինի Ազրպէյճանին արտայանձնումին անդրադարձան հայրենի քաղաքական գործիչներ, ինչպէս նաեւ մարդու իրաւունքներու պաշտպաններ:



Արտաքին գործոց նախարար Էդուարդ Նալբանդեանն նշեց, որ 8 Փետրուարի առաւօտեան արտաքին գործոց նախարարութեան մամլոյ բանբերին միջոցով նախարարութիւնը արձագանգած է այդ հարցին, իսկ անկէ առաջ ալ մամլոյ ասուլիսի մը ընթացքին հարցը որակած է խայտառակութիւն՝ ըսելով, որ ասիկա կը վնասէ Պիելոռուսիոյ վարկանիշին:

Նախարարին խօսքով՝ հասկնալի է Հայաստանի մէջ գոյութիւն ունեցող վրդովումը, զոր ցուցաբերեց հասարակութիւնը Լափշինի արտայանձնումին առիթով:

Ըստ Նալբանդեանի, Ազրպէյճան այդ քայլերուն կը դիմէ, որպէսզի մարդիկ չայցելեն Արցախ: «Արդեօ՞ք ասիկա կը կանգնեցնէ օտարերկրեայ գործիչներու այցելութիւնները Արցախ, վստահաբար ոչ, այցելութիւնները պիտի շարունակուին: Այդ ուղղութեամբ քայլեր առնուած են ու պիտի առնուին, բայց չեմ կարծեր, որ այդ գործողութիւններուն մասին մենք պէտք է յայտարարենք», ըսաւ նախարարը:

Հայաստանի արդարադատութեան նախարար Արփինէ Յովհաննիսեան յայտնեց, որ Լափշինի արտայանձնումը իրաւական ոչ մէկ հիմք ունի՝ հաստատելով, որ ան յատկապէս Պիելոռուսիոյ մէջ ոչ մէկ յանցանք գործած է, ուստի պլոկըրին դեմ դատ բանալու դրդապատճառ չկայ, այլ անիկա խախտում է ո՛չ միայն միջազգային մակարդակով ընդունուած սկզբունքներուն, այլ նաեւ Պիելոռուսիոյ քրեական դատավարութեան օրէնսգիրքին ու քրեական օրէնսգիրքին:

Հայաստանի մարդու իրաւունքներու պաշտպան Արման Թաթոյեան Պրիւքսելի մէջ Հարաւային Կովկասի եւ Վրաստանի ճգնաժամի հարցերով Եւրոպական Միութեան յատուկ ներկայացուցիչ Հերպըրթ Զալպերի հետ ունեցած հանդիպումին ընթացքին անդրադարձած է այս հարցին՝ զայն անթոյլատրելի նկատելով եւ շեշտելով, որ հիմա աւելի պէտք է աշխուժացնել այցելութիւնները Լեռնային Ղարաբաղ:

Լեռնային Ղարաբաղի Հանրապետության մարդու իրաւունքներու պաշտպանը յայտարարութեամբ մը դատապարտած է պլոկըր Ալեքսանտր Լափշինի Ազրպէյճանին արտայանձնումը: «Լափշինը քրեական հետապնդման ենթարկելով Ազրպէյճան մտադիր է նախընթաց մը ստեղծել եւ Արցախի ազատ խօսքը լռեցնել ու սպառնալ բոլոր անոնց, որոնք կը փափաքին Արցախ այցելել:

«Բայց եւ այնպէս, Ազրպէյճան պիտի չյաջողի Լափշինի դատը իրաւական նախընթացի վերածելու մէջ, քանի որ անոր իբրեւ հիմք նկատի առնող պատճառաբանութիւնը ժողովրդական բնոյթ կրող որեւէ պետութեան կամ հաստատութեան համար մերժելի է:

«Աւելի՛ն, Լափշինի բողոքարկումը դրդապատճառ պիտի հանդիսանայ՝ աւելցնելով մարդու իրաւունքներու գաղափարախօսութեան ազնուութեամբ նուիրեալ իրաւապաշտպաններուն, խօսքի ազատութեան ամենայն ազնուութեամբ նուիրեալ լրագրողներուն հետաքրքրութիւնը Արցախի նկատմամբ: Սփիւռքի կառոյցներուն, հայկական իրաւապաշտպան ու լրագրական շրջանակներուն կոչ կ'ուղղեմ՝ ներգրաւուելու Լափշինի գործին հակառակ ազդուութիւն տալու մէջ եւ հակադարձութեան մղիչ ուժի վերածելու զայն»:

Գասպարեան. «Նախագահին Պահանջն Է՝ Ընտրական Հոլովոյթին Մէջ Պահպանել Օրէնքի Տառն Ու Ոգին»

7 Փետրուարին Հայաստանի ոստիկանութեան պետ, ոստիկանութեան գնդապետ-գորավար Վլատիմիր Գասպարեան տարեսկիզբի աշխատանքային հանդիպումներու շրջագիծին մէջ խորհրդակցութիւն ունեցած է ոստիկանութեան Տաւուշի մարզային վարչութեան ու ենթակայ ստորաբաժանումներու ղեկավարներուն մասնակցութեամբ:

Հայաստանի Հանրապետութեան ոստիկանութենէն կը տեղեկացնեն, որ խորհրդակցութեան կը մասնակցէր Տաւուշի մարզպետ Յովիկ Աբովեան:

Վլատիմիր Գասպարեան նշեց, որ դրական տեղաշարժեր կան մարզի ոստիկանութեան աշխատանքին մէջ, սակայն արդիւնքները տակաւին հեռու են բաւարար ըլլալէ, ուստի այս տարուան ընթացքին կը նախատեսուի ոստիկանութեան կեդրոնական ղեկավարութեան եւ մարզային ստորաբաժանումներու աւելի սերտ աշխատանք:



Անդրադառնալով ոստիկանութեան խնդիրներուն՝ ոստիկանութեան պետը կարելոր նկատեց համայնքային ոստիկանութեան կայացման անհրաժեշտութիւնը:

Վլատիմիր Գասպարեան անդրադարձաւ նաեւ ընտանեկան բռնութիւններու դէմ պայքարին եւ յատկապէս անչափահասներուն հետ տարուող աշխատանքի խնդիրներուն:

Վլատիմիր Գասպարեան խորհրդակցութեան մասնակիցներուն ուշադրութիւնը հրաւիրեց յառաջիկայ համապետական ընտրութիւններուն ընթացքին ոստիկանութեան դերակատարութեան եւ գործառոյթներուն՝ նշելով, որ հանրապետութեան նախագահին

պահանջն է՝ ընտրական ամբողջ հոլովոյթին առաւելագոյնս պահպանել օրէնքի տառն ու ոգին, ըլլալ բացարձակ արդար եւ անխոցելի:

Ոստիկանութեան պետը խորհրդակցութեան մասնակիցներուն անգամ մը եւս յիշեցուց գիւղական շրջաններուն մէջ ոստիկանութեան գործունէութեան եւ գիւղացիին հետ աշխատանքի առանձնայատկութիւններուն մասին:

Աշխատանքային խորհրդակցութեան աւարտին Վլատիմիր Գասպարեան մասնակիցներուն տուաւ ցուցմունքներ եւ յանձնարարականներ:

Լեռնային Ղարաբաղի Հանրապետութեան Պաշտպանութեան Բանակ. «Ազրպէյճանական Կողմը Կրկին Դիմած Է Սադրիչ Գործողութիւններու»

Չորեքշաբթի օր Ազրպէյճանական կողմը ԵԱՀԿ-ի առաքելութիւնը դարաբաղեան-Ազրպէյճանական հակամարտ գորքերու շփման գիծին մէջ տեղի ունեցած դիտարկման ժամանակ իր առաջնային դիրքեր դուրս չբերելէ ետք, շփման գիծին մէջ անգամ մը եւս դիմած է սադրիչ գործողութիւններու:

Լեռնային Ղարաբաղի Հանրապետութեան պաշտպանութեան նախարարութեան մամլոյ ծառայութենէն կը յայտնեն, թէ ժամը 17:00-էն 18:50-ի միջեւ հակառակորդը իր բնակավայրերուն մերձակայքը տեղակայուած կրակային յենակէտերէն 85 միլլիմէթրնոց Դ-44 տիպի հրանօթներէ ուղիղ նշանառութեամբ հրթիռակոծութեան ենթարկած է պաշտպանութեան բանակի արեւելեան ուղղութեամբ տեղակայուած զինուորական դիրքերը: Բացի հրանօթներէ, ազրպէյճանական զինուժը ինչպէս արեւելեան, այնպէս ալ հիւսիսային (Թալիշ) ուղղութեամբ օգտագործած է տարբեր տրամաչափի ականանետեր: Այդ հաղորդագրութեան հրապարակման պահու (Չորեքշաբթի օր երեկոյեան) դրութեամբ, հրանօթներէ եւ ականանետերէ, ընդհանուր առմամբ, արձակուած է 46 արկ, որոնցմէ 22-ը հրանօթներէ, 24-ը՝ ականանետերէ:



Հակառակորդի նախայարձակ գործողութիւններուն պատճառով պաշտպանութեան բանակը կորուստներ չունի:

Լեռնային Ղարաբաղի Հանրապետութեան պաշտպանութեան նախարարութիւնը յայտարարած է, որ Ազրպէյճանի կողմէ ձեռնարկուած սադրիչ գործողութիւններու եւ անոնց հետեւանքներու ամբողջ պատասխանատուութիւնը կ'իյնայ պաշտօնական Պաքուի ռազմաքաղաքական ղեկավարութեան վրայ: Նման սադրանքներու շարունակականութեան պարագային Լեռնային Ղարաբաղի Հանրապետութեան պաշտպանութեան բանակը, Արցախի պետական սահմաններուն անվտանգութիւնը ապահովելու նպատակով, ինքն իրեն իրաւունք կը վերապահէ դիմելու ոչ համարժէք քայլերու:

ՄԻՋԱԶԳԱՅԻՆ

ՏՐ ՄԻԿՐՈՒՐԱ ՅԵՏԱԸԳԱԾ Է ՍՈՒՐԻՈՅ ՇՈՒՐԶ ԲԱՆԱԿԳՈՒԹԻՆՆԵՐՈՒ ՀՐԱՒԵՐՆԵՐՈՒ ՅՊՈՒՐ

ԹԱՍՍ լրատու գործակալությունը կը հաղորդէ, որ Սուրիոյ հարցով ՄԱԿ-ի յատուկ պատուիրակ Սթեֆան տը Միսթուրա ժընեի մէջ միջսուրիական բանակցութիւններու հրաւերներու առաքումը յետաձգած է 8 Փետրուարէն աւելի ուշ ժամկետի: Բանակցութիւնները նախատեսուած են 20 Փետրուարին:

«Հրաւերները պիտի ուղարկուին մօտ օրէն եւ ոչ թէ 8 Փետրուարին, ինչպէս նախապէս յայտարարուած էր», նշուած է հաղորդագրութեան մէջ:Տը Միսթուրայի գրասենեակէն կը բացատրեն, որ յետաձգման պատճառը «սուրիական կողմերուն հետ այժմ ընթացող խորհրդակցութիւններն են, որոնք կը վերաբերին պատուիրակութիւններու կազմութեան»:

Միեւնոյն ժամանակ, ինչպէս ընդգծուած է հաղորդագրութեան մէջ, «հրաւերները ուղարկելու ժամկետն անկախ, յատուկ պատուիրակը կը պահպանէ 20 Փետրուարին միջսուրիական բանակցութիւններ հրաւիրելու իր մտադրութիւնը»:

Իրանի Հետ Լարուածութեան Պատճառով. Արաբական Ծոցի Ամերիկեան Ուժերը Բերուած Են Պատրաստութեան Բարձրագոյն Աստիճանի

Միացեալ Նահանգներու պաշտպանութեան նախարարութենէն աղբիւր մը «ՌԻԱ Նովոսթի»-ին յայտնած է, որ Արաբական ծոցին մէջ ամերիկեան ուժերը բերուած են «պատրաստութեան բարձրագոյն աստիճանի»՝ Իրանի հետ յարաբերութիւններուն մէջ լարուածութեան աճին եւ զօրքերու ու սարքաւորումներու ընդհանուր պատրաստուածութեան մասին մտահոգութիւններուն պատճառով:

Նախապէս Միացեալ Նահանգներու Ազգային անվտանգութեան խորհրդատու Մայքըլ Ֆլին յայտարարած էր, որ Սպիտակ տունը «պաշտօնապէս կը զգուշացնէ» Իրանը շրջանին մէջ կատարուելիք գործողութիւններու առնչութեամբ, ներառեալ հեռահար հրթիռներու փորձարկումը:Նշենք, որ Ռուսիոյ արտաքին գործոց նախարարութիւնը Չորեքշաբթի օր յայտարարեց. «Մոսկուա լարուածութիւնը մեղմացնելու համար մնայուն կապի մէջ է Ռաշիսկթընի եւ Թեհրանի հետ»:

Թրամփ-Էրտողան Առաջին Հեռաձայնային Զրոյց

Թրքական «Անատոլու» լրատու գործակալութիւնը կը հաղորդէ, որ Միացեալ Նահանգներու նախագահ Տանըլտ Թրամփ, իր պաշտօնավարման առաջին հեռաձայնային հաղորդակցութիւնը ունեցած է Թուրքիոյ նախագահ Ռեճեփ Թայիփ Էրտողանի հետ:

Հեռաձայնային զրոյցին ընթացքին նախագահները խօսած են Թուրքիա-Միացեալ Նահանգներ յարաբերութիւններուն մասին, վերահաստատած են ահաբեկչութեան դէմ պայքարելու պատրաստակամութիւնը:Թրամփ ըսած է, որ Միացեալ Նահանգներ կ'աջակցին ՕԹԱՆ-ի դաշնակից եւ ռազմավարական գործընկեր Թուրքիոյ:Միացեալ Նահանգներու նախագահը բարձր գնահատած է Թուրքիոյ կողմէ ՏԱՀԵՇ-ի դէմ գործողութիւնները:

ԱՆՂԱՐԱՐ

Խմորո՞ւմ Մը Կը Պատրաստուի

Վերջերս, ՀՅԴ Արցախի Կեդրոնական կոմիտեն յայտարարութիւն մը հրատարակեց՝ յայտնելով, թէ դաշնակցական պատգամաւորները դէմ պիտի քուէարկեն սահմանադրութեան վերամշակուած նախագիծին, որովհետեւ անիկա չի նպաստեր պետական համակարգի բարելաւումին, չի համապատասխաներ համակարգը առաւել ժողովրդավարացնելու կուսակցութեան պատկերացումին, հետապնդած նպատակին...



Նախագիծը Ազգային ժողովէն քուէարկուած ըլլալով, արդէն իսկ նախագահական հրամանագիրով որոշուած է հանրաքուէի թուականը՝ 20 Փետրուար 2017:

Մշակուած նախագիծով փոխանակ անցում կատարելու խորհրդարանական համակարգի, իշխանութիւնը առաւել եւս կը կեդրոնացուի նախագահի անձին վրայ:

Զգիտցող չկայ, որ մեր երկու պետութիւնները՝ Հայաստանն ու Արցախը, ամէն մարզի մէջ լծակից են իրարու, իրարմէ կախեալ են ու զիրար կ'ամբողջացնեն:

Զարմանալի է ու անհասկնալի է, որ Հայաստանը խորհրդարանական համակարգի կ'անցնի, մինչ անդին՝ իր լծակիցը հակառակ ուղղութիւնը աւելիով կ'ամրապնդէ: Ի՞նչ հիմնաւորում կրնայ ունենալ այս զարտուղի ընթացքը:

Ակամայ կասկած կ'արթննայ, թէ համակարգին հետ այնքան ալ չառնչուող քաղաքական խոհանոցին մէջ կը պատրաստուի ինչ որ խմորո՞ւմ մը, որուն համար կարելոր կը նկատուի միանձնեայ վճիռը... Արդեօք: Այլապէս, ինչո՞ւ այս յետընթացը:

Հապա լրատուներուն լռութի՞ւնը:

ՄԻՀՐԱՆ ՔԻԻՐՏՕՂԼԵԱՆ


ՄԿՆԱՐԿ

2017 Հայուն «Վերանորոգումի» Գործընթացը

«Քրիստոնէական Սօսեցումով, Մարդն Է Վերանորոգման Կիզակէտը»

Արամ Ա. Վեհափառ Հայրապետ

Աստուածաբանութիւնը՝ քրիստոնէական-աստուածաշնչական, եթէ մէկ կողմէ ունի համամարդկային տեսադաշտ եւ պարունակութիւն, բայց միեւնոյն ժամանակ՝ առանձնայատկութիւն, ուր իւրաքանչիւր անհատ կ'ընդելուզուի հաւաքականութեան մշակոյթին, քաղաքակրթութեան եւ կենցաղի հետ եւ այս բոլորին ընդմէջէն՝ անոր/անոնց ապրած կեանքին ու փորձառութեան կու տայ նկարագիր եւ ինքնութիւն:



Մակայն հիմնական կը մնայ այն, որ քրիստոնէական Աստուածաբանութեան միտք բանին «փոփոխութիւն» յառաջացնել է մարդուն եւ հաւաքականութեան կեանքերուն համար (Ճեսէ Մուկամպէ եւ Մայքըլ Կայ, 2009): Եւ այս իմաստով, Մեծի Տանն Կիլիկիոյ Արամ Ա. վեհափառ հայրապետը իւրաքանչիւր տարուան սեմին հայ ժողովուրդի զաւակները կը հրաւիրէ «իրենց մտածումներուն, աշխատանքներուն ու կեանքին մէջ լուսարձակի տակ բերելու ազգին ու եկեղեցւոյ առնչուած արժէք մը, խոր մտահոգութեան մը կամ լուրջ սպասում մը»: Եւ այս «արժէքի», «մտահոգութեան» եւ «սպասումի» գիտակցութիւնը վեհափառ հայրապետի ջանքերէն մին է՝ «փոփոխութիւն» յառաջացնելու մեր անհատական, հաւաքական ու ազգային կեանքերուն մէջ: Եւ փոփոխութիւնը, եթէ մէկ կողմէ «հնամաշ գործելակերպերէ եւ յոռի կենցաղակերպերէ» հեռու մնալ է, բայց նաեւ է՝ «կրօնական, ազգային ու բարոյական արժէքներու, աւանդութիւններու ամբօրէն կառչիլ», հետամուտ ըլլալով «բացուելու, քննական ու զգուշաւոր մօտեցումով մեզ շրջապատող իրականութիւններուն եւ մարտահրաւերներուն»:

Եւ այս հասկացողութեան մէջ եւ անոր ընդմէջէն կ'արժէ վեր առնել 2017 թուականը վերանորոգումի տարի յայտարարելու վեհափառին քայլը:

Արդարեւ, Արամ Ա. կաթողիկոս իր «վերանորոգումի» բացատրութիւնը կը սկսի աստուածաշնչային տեսանկիւնէն՝ զետեղելու համար զայն մեր ազգային-հաւաքական-հասարակական կեանքերուն մէջ: Որովհետեւ, եւ ինչպէս վեհափառ հայրապետը կը մատնանշէ, «Աստուածաշունչը իր էութեամբ, իր խորքով ու նպատակով մարդը դէպի հոգեւոր ու բարոյական վերանորոգում առաջնորդող երկնային պատգամ մըն է՝ Աստուծոյ յայտնութեամբ փոխանցուած մարդուն»:

Քրիստոնէական աստուածաբանութեան եւ անոր մարդկային անհատականութեան ու կեանքին մէջ «փոփոխութիւն» յառաջացնելու հասկացողութիւնը կը սկսի Աստուածաշունչի Հին Կտակարանէն: Եհովան՝ Հին Կտակարանի Աստուծոյ

անուանումը, եւ անոր «խոստումը» «իր ժողովուրդին», իմա՝ յոյսը...: Եւ այս խոստումը՝ յոյսը, ակներեւ է Հին Կտակարանի շատ մը գիրքերուն մէջէն՝ սկսելով Ելից գիրքէն: Հրեայ ժողովուրդի քառասուն երկար տարիներու անապատին մէջ թափառումը պէտք է ընկալել որպէս Աստուած-ժողովուրդ յարաբերութեան, իրարու նկատմամբ վստահութեան եւ իրարու առնչուելու գրաւականը: Եւ թէ Աստուծոյ «խոստումը»՝ «յոյսը», որ «իր ժողովուրդը» պիտի հասցնէ «խոստացուած երկիրը», պէտք չէ անպայմանօրէն առնչել «մէկ ժողովուրդի» պատմութեան, եւ ոչ ալ «երկիրը» պէտք է հասկնալ ներկայ օրերու միջինարեւելեան հողի ու տարածաշրջանի քաղաքական ու ռազմավարական հակամարտութիւններու բացատրութեան մէջէն: «Իր ժողովուրդը» ունի ընդհանրական (համամարդկային) բացատրութիւն եւ մեկնաբանութեան հասկացողութիւն: Իսկ «երկիր»-ը խոստումն է հասնելու նորին ու նոր սկիզբին եւ բոլոր ժողովուրդներուն համար (Նայիմ Աթիք, 1995): Եւ Հին Կտակարանի Մարգարեութիւններու մէջէն կը տեսնենք այս համապարփակ իրականութիւնը: «Ո՛վ կղզիներ, ինձի մտիկ ըրէք, ո՛վ ժողովուրդներ, հեռուն ականջ տուէք... որպէսզի մինչեւ երկրին ծայրը իմ փրկութիւնս ըլլայ» (Եսայեայ 49:1,6): Ու տակաւին նոյն Մարգարեութիւններու մէջ՝ այս նորին՝ իմա՝ վերանորոգումի խոստումը կ'երեւի. «Իմ տունս անոր մէջ պիտի շինուի... իմ քաղաքները նորէն բարիքներով պիտի յորդին եւ Տէրը նորէն Սիոնը պիտի մխիթարէ» (Զաքարեայ 1:16-17):

Բայց կայ այս նոյն «խոստումին»՝ յոյսին իրականացումը: Եւ այս կու գայ Նոր Կտակարանի մէջ Աստուծոյ՝ «Մեսիայով»՝ իմա՝ Քրիստոսով: Եւ խոստումը՝ (իմա՝ յոյսը եւ անոր յառաջացուցած փոփոխութիւնը) մարդուն վերանորոգումի հասկացողութեան մէջ էր, որ իրականացաւ Աստուծոյ մարդեղութեամբ: Եւ հոս է, որ պէտք է կամրջել հին կտակարանի Աստուածը՝ Եհովան ու նոր կտակարանի Մեսիան՝ Քրիստոսը՝ որպէս մէկ ինքնութիւն: Եհովային յոյսի խոստումը՝ մարդուն վերանորոգումը, որ կ'իրականանայ Մեսիային՝ Քրիստոսի յայտնութեամբ:

Ուոլթըր Պրուկման (2001) «նոր»-ը կը նկարագրէ Քրիստոսի խաչին հասկացողութեան ընդմէջէն: Ան կը ներկայացնէ, թէ Քրիստոս «քննադատեց» հինը, երբ այս աշխարհի մէջ էր եւ իր մահուամբ խաչին վրայ քանդեց այն բոլորը, զորս քննադատեց: Իր յարութեամբը շինեց «նոր»-ը՝ վերանորոգուած հաւաքականութիւնը, որպէսզի մարդկութիւնը ունենայ նոր սկիզբ: Եւ այս նոր սկիզբն է, որ մարդուն եւ հաւաքականութեան կեանքերուն մէջ կը յառաջացնէ փոփոխութիւն՝ վերանորոգումի տեսլականով: Եւ այս վերանորոգումի տեսլականը վեհափառ հայրապետը կը դնէ որպէս «անյետաձգելի անհրաժեշտութիւն»:

«Եւ այս վերանորոգումի կիզակէտը, քրիստոնէական մօտեցումով, մարդն է...»: Մարդուն փոփոխութիւնն է, վերանորոգումն է, որ յառաջ պիտի տանի հաւաքականութեան վերանորոգումը: Եւ եկեղեցի հասկացողութիւնը պէտք է ընդարձակել նոյնինքն այս նոր՝ վերանորոգուած մարդկային կեանքի տեսադաշտէն: Հոն, ուր եկեղեցին «իր կեանքին ու առաքելութեանը օրակարգին վրայ միշտ առաջնահերթ տեղ տուաւ վերանորոգումին» (Արամ Ա. վեհափառ հայրապետ):

Որովհետեւ եկեղեցին այս վերանորոգուած եւ վերանորոգող կեանքերը տեսապէս «արտադրելու» հրամայականին մէջ գտնուած է ու պէտք է շարունակել ընել նոյնը:



Եթէ Քրիստոսի խաչը եւ յարութիւնը աշխարհը չփոխեցին, բայց Ան փոխեց Իր առաքեալները: Եւ առաքեալները փոխեցին աշխարհը (Ճոան Տելափիլէյն, 2012): Եւ վերանորոգումի գործընթացը փոփոխութիւն յառաջացնելու մէջ է: Եթէ այս փոփոխութիւնը չըլլայ՝ քրիստոնէական հասկացողութենէն եւ անոր պրիսմակէն, սխալ բան մը պատահած պիտի ըլլայ: Փոփոխութիւնը եւ անոր հետ յառաջ եկած նորն ու

նորութիւնը շարունակուող եւ տեւապէս աճող, զարգացող եւ վերանորոգող գործընթաց մըն է, ուր անհատական եւ հաւաքական մեր կեանքերը տեւապէս կը վերանորոգուին:

Եւ վեհափառ հայրապետը վերանորոգումի այս աստուածաբանական միտք բանին է, որ կը դնէ մեր ազգային-հաւաքական կեանքերուն համար եւ՝ 2017 տարուան որպէս գիտակցութիւն: Որովհետեւ, եւ ինչպէս վեհափառ հայրապետը կ'ընդարձակէ իր տեսութիւնը, «կարելի չէ բաժանման գիծ մը քաշել քրիստոնէական ու ազգային մօտեցումներուն կամ արժեւորման միջեւ»: Եւ այս իմաստով, մեր համահայկական (սփիւռք եւ հայրենիք) վերանորոգումի գործընթացը կը սկսի նոյնիմքն հայ մարդէն: Իւրաքանչիւրէս...

Հայ մարդուն վերանորոգումը կարելոր հիմք է: Բայց կայ նոյնքան գիտակցութիւնը: Իւրաքանչիւր վերանորոգուած հայ անհրաժեշտ է, որ դառնայ «Առաքեալ»...: Առաքեալ, որ պարտի վերանորոգել միւս հայը... Ու բոլորը միասին հայ հաւաքականութիւնը՝ Ազգ ու Հայրենիք: Եւ վեհափառը կը դնէ այս իրականութիւնը հայուն դիմաց՝ որպէս մարտահրաւեր: «Իւրաքանչիւր ազգի զաւակ՝ որպէս հարազատ անդամը մեր Մեծ Ընտանիքին, որ կոչուած է իր ապրած կեանքի որակով ու հարուստ գործերով կարելոր նպաստը բերելու մեր եկեղեցւոյ, ազգին ու հայրենիքին...»:

Հայուն վերանորոգումի գործընթացը հայ մարդէն կը սկսի, բայց կը շարունակուի՝ հասնելու համար հաւաքականութեան, ազգին ու հայրենիքին: Ապա թէ ոչ, եւ ինչպէս վեհափառ հայրապետը կը զգուշացնէ. «Մեր համայնական կեանքերը դէպի մեկուսացում, աղքատացում ու ճահճացում կրնան երթալ»:

Հայ մարդուն վերանորոգումը: Թող որ 2017 տարուան համար դառնայ առաքելութիւն, ուր իւրաքանչիւր հայ կը վերանորոգուի, բայց նաեւ կը դառնայ... Առաքեալ: Եւ կը վերանորոգէ միւս հայը: Ու բոլոր միասին կը վերանորոգեն հայկական հաւաքական կեանքը:

Եւ ասիկա հայուն վերանորոգումի գործընթացն է, ուր իւրաքանչիւր հայ կը վերանորոգուի եւ կը վերանորոգէ: Հայ անհատը եւ նաեւ՝ հայկական հաւաքականութիւն(ներ)ը:

ԴՈՎՏ. ՀՐԱՅՐ ՃԷՊԷՃԵԱՆ



Հովանավորությամբ՝

Քուէլթի, Էւ Շրջակայից Թեմի Առաջնորդ
Գերայ. Տէր Մա՛հիս Ծ. Վրդ. Զօպուեանի

Կազմակերպությամբ՝

ՀՅԴ

Քուէլթի Քրիստափոր Երիտասարդական
Էւ Հրայր Դժոխք Պատանեկան Միութիւններու

Պիտի դասախօսէ

Մեծի Տանն Կիլիկիոյ Կաթողիկոսութեան Երիտասարդ միաբաններէն՝

Հոգ2. Տ. Նշան Վրդ. Լախոյեան

Նիւթ ունենալով՝

**ՀԱՅ ԵՐԻՏԱՍԱՐԴԸ ԵՒ ԴԱՐՈՒՄ ԱԶԳԱՅԻՆ ԵՒ
ՄԱՐԴԿԱՅԻՆ ԱՐԺԷՔԱՅԻՆ ՀԱՄԱԿԱՐԳԸ**

Տեղի կ'ունենայ Ուրբաթ, 10 Փետրուար 2017-ին, երեկոյեան
ժամը 6:00-ին, Սրբ. Վարդանանց եկեղեցոյ մէջ:

Կը հրաւիրենք մեր ժողովուրդի զաւակները ներկայ գտնուելու
Էւ ունկնդրելու Հայր Սուրբին շահեկան դասախօսութիւնը:

ԼՈՒՐԵՐ ԳԱՂՈՒԹՆԵՐԷՆ

Միհրան Թորոսեանի «Սար» Թատրերգութիւնը

Նոր Ջուղայի ՀՄՄ «Արարատ» միութեան Կեդրոնական վարչութեան հրաւերով, «Ֆաճր» թատերական 35-րդ միջազգային փառատօնի ծիրէն ներս, 27 յունուարին միութեան սրահին մէջ բեմադրուեցաւ բեմադրիչ Է. ղերասան Միհրան Թորոսեանի «Սար» թատրերգութիւնը:

Թորոսեան մարմնաւորեց հայ ժողովուրդի կազմաւորումը, ապրած կեանքի վերիվայրումները, Հայոց ցեղասպանութիւնը և անոր պատճառով սփիւռքի ձեւաւորումը: Ներկայացումը



շարունակուեցաւ հայոց պատմութեան հետագայ զարգացումներով՝ շեշտելով միասնութեան գաղափարը, և հասաւ իր աւարտին վերածնունդը ներկայացնող խորհրդանիշով և հայ ժողովուրդի յաւերժութեան և լուսաւոր ու պայծառ ապագայ ունենալու պատգամով:

Այս բոլորը մեկնաբանուեցան «Սրբազան լերան» լեզուով, առանց բառերու, լուռ ու անխօս:

Ներկայացման աւարտին միութեան Կեդրոնական վարչութեան անդամ Մանիա Ղուկասեան ներկայացուց Միհրան Թորոսեանը, ինչպէս նաեւ՝ անոր ընկերակցող երաժշտական ձեւաւորող և համադրող «Ուստա Մարօ»-ն և միւս ընկերները: Ապա յուշանուէր մը յանձնուեցաւ թատերախումբի անձնակազմին:

Մ. Թորոսեան ելոյթ ունենալով՝ ամփոփ տեղեկութիւններ տուաւ թատերախումբին, անոր գործունէութեան և Պոլսոյ հայկական համայնքին ու կառոյցներուն մասին: Այնուհետեւ ներկաները առիթը ունեցան հարցումներ ուղղելու բեմադրիչին: Եզրափակիչ խօսքը արտասանեց Անանիա Ծ. վրդ. Գուճանեան, որ ողջունեց խումբին ներկայութիւնը և իր գոհունակութիւնը յայտնեց գեղեցիկ, բարդ և միաժամանակ դիւրամբօնելի ներկայացման համար: Ան հաստատեց, որ Մպահանի հայոց թեմի գաւակներուն սրտին և կեանքին մէջ միշտ ներկայ է Հայոց ցեղասպանութիւնն ու Արարատ լեռը:

Սրբոց Վարդանանց Եկեղեցւոյ Հիմնադրութեան 30-ամեակ

Հովանաւորութեամբ թեմի առաջնորդ Սեպուհ արք. Սարգիսեանի, 26 Յունուարին նշուեցաւ Սրբոց Վարդանանց եկեղեցւոյ հիմնադրութեան 30-ամեակը:




Ալենուշ Պաղտասարեանի արտասանած բացման խօսքէն ետք Արփի Ալավերդեան կարդաց օրուան առիթով առաջնորդ սրբազանին գնահատանքի եւ օրհնութեան խօսքը:

Գեղարուեստական յայտագրի ընթացքին ցուցադրուեցաւ տեսերիզ մը, եւ կարդացուեցան օրուան առիթով ստացուած ուղերձները:

Աւարտին սրբազան հայրը ելոյթ ունենալով՝ շնորհաւորեց եկեղեցւոյ հիմնադրութեան 30-ամեակը եւ մեծապէս գնահատեց եկեղեցւոյ խորհուրդի աշխատանքը:

Շարլ Ազնաւուրի Համերգը

2015-ի մայիսին Մատրիտի մէջ ելոյթ ունենալէն 2 տարի ետք, երաժիշտ Շարլ Ազնաւուր համաշխարհային համերգի շրջագայութեան ծիրէն ներս, Մատրիտի «Պարքլեքարթ սենթըր»-ի մէջ հանրութեան պիտի ներկայանայ համերգով մը:



92-ամեայ Ազնաւուր հայերէն կը խօսի, բայց չի գրեր եւ չի կարդար, սակայն այս մէկը չի խանգարեր անոր Զուիցերիոյ մէջ Հայաստանի դեսպանի իր աշխատանքին: Ան նկատել տուած է, որ կը համատեղէ երաժշտական գործունէութիւնը դիւանագիտական աշխատանքին հետ:

ԱՅԼԱԶԱՆ

Սուրբ Սարգիս Տօնը

Ս. Սարգիսը շարժական տօն է. այս տօնով կը սկսի Բարեկենդանը, որուն անմիջապես յաջորդող 49 օրեայ Մեծ պահքը կ'աւարտի Ջատիկով: Այսպիսով, անուղղակիօրէն կ'ապուելով 35 օրուան շարժականութիւն ունեցող Ջատկուան հետ, Ս. Սարգիսի տօնը նոյնպէս կը շարժի 35 օրերու ընթացքին, նշուելով Յունուար 18-էն մինչեւ Փետրուար 23-ը երկարող այն շաբաթ օրը, որ տուեալ տարուան Ջատկուան տօնէն ճիշդ 63 օր առաջ կու գայ:

Ս. Սարգիս Զօրավարի տօնը Հայաստանի մէջ ընդունուած է նշել ոչ միայն եկեղեցական ծէսով, աղօթքով, այլեւ՝ ժողովրդական սովորութիւններով, որոնք նուիրական ասանդութիւններ դարձած են:

Ս. Սարգիս Զօրավարը երիտասարդներու արագահոս բարեխօսն է, իր միջնորդութեամբ հրաշքներ տեղի կ'ունենան: Այդ օրը երիտասարդները կ'աղօթեն սուրբին, որպէսզի իրենց աղօթքները հասցնէ Աստուծոյ:

Ս. Սարգիս հայ ժողովուրդի ամենէն աւելի սիրած սուրբերէն է: Անոր մասին բազմաթիւ ասանդապատումներ կան, ինչպէս նաեւ՝ ժողովրդական սովորութիւններ:

Տօնին կը նախորդէ Ս. Գրիգոր Լուսաւորիչին կողմէ հաստատուած առաջաւորաց պահքը, որ կը տեւէ 5 օր:

Ժողովրդական սովորութիւններէն է Ս. Սարգիսի տօնին ալիւրով լեցուն ափսէ դնել տան տանիքը կամ պատշգամին եւ սպասել Ս. Սարգիս Զօրավարի ձիուն պայտի հետքին: Ըստ ասանդութեան, Ս. Սարգիսը պէտք է հրեշտակներու ուղեկցութեամբ անցնի, եւ որու որ ափսէին մէջ դրուած ալիւրին վրայ ձգէ իր սպիտակ ձիուն պայտին հետքը, այդ տարի կ'իրականանան երիտասարդին երազները:

Ամբողջ պատմական Հայաստանի տարածքին Ս. Սարգիսին անունով շատ սրբավայրեր կան, եկեղեցիներ, մատուռներ, նոյնիսկ՝ լէռ:

Մուսա լեռան ասանդական խոհանոցին մէջ մինչեւ օրս պահպանուած է «գումպա» անունով ծիսական հաց-քաղցրեղէնի պատրաստութիւնը: Խմորը կը շաղեն երեկոյեան եւ անիկա ամբողջ գիշերը կ'եփի մարած թոնիքի տաքութեամբ:

Գումպան կը բաժնուի ընտանիքի անդամներուն թիւով: Բաժիններէն մէկուն մէջ մետաղադրամ կը դրուի, եւ որո՞ւ որ ելլէ դրամը, ան կը համարուի տարուան բախտաւորը:

Ս. Սարգիսի նախորդող առաջաւորաց պահքի օրերուն մարդիկ ոչ միայն արգելքներ կը դնէին իրենց սնունդէն, այլ նաեւ աշխատանքի որոշ տեսակներուն եւ մարմնի խնամքին վրայ: Արգիլուած էր լուացք ընել, ճախարակ մանել, գործ ունենալ բուրդի հետ, որովհետեւ կը հաւատային, որ մազ լուալու պարագային Ս. Սարգիսի ձիու ոտքերուն թնձուկ կը փաթթուի եւ որպէս պատիժ՝ իրենց մազերը կը թափին...

Ուրբաթ օրը մարդիկ կը սկսէին թաթախման պահքը բանալու նախապատրաստական աշխատանքները: Մեղրաջուրով կամ շաքարաջուրով փոխինդ կը շաղէին, ընտանիքին անդամներուն թիւով գունդերու կը բաժնէին եւ երեկոյեան պահքը կը բանային գունդերով:

Մակայն ծոմ պահած երիտասարդները չէին ուտեր, անոնք այդ երեկոյ աղի կրկնեփ կ'ուտէին, որպէսզի տեսնեն, թէ երագին մէջ իրենց ո՛վ ջուր պիտի տայ: Շաբաթ առտու աղի կրկնեփ կերած աղջիկներն ու մանչերը կը պատմէին իրենց երագները, թէ ո՛վ իրենց ջուր տուաւ, ինչպիսի՞ գաւաթով, որքա՛ն ջուր կար գաւաթին մէջ եւ այլն... Ոսկեայ գաւաթը հարուստ ամուսին կը նշանակէր: Փայտեայ գաւաթը՝ աղքատ, լեցուն գաւաթը երկար ամուսնական կեանք կը նախագուշակէր, կիսով լեցունը՝ կարճ ամուսնական կեանք, եւ այլն...

Աւանդութեան համաձայն, Ս. Սարգիսի կրկնեփը պէտք է պատրաստէր հաւաքուած կիներէն ամենաերջանիկը, ան, որ մեծ սէր ապրած էւ երեխաներ ունեցած է: Կրկնեփին բաղադրութիւնը շատ պարզ է՝ ալիւր, աղ եւ ջուր: Պատրաստելու համար 3 բաղադրութիւնները խառնել, շաղել, սրտաձեւ կամ կլոր ձեւաւորել եւ նախքան փուռին մէջ եփելը ծակեր բանալ՝ մէջերէն ժապաւէն անցընելու համար:

Նկարչուհի, ազգագրագէտ Լուսիկ Ագուլեցիի խօսքերով, Ս. Սարգիս տօնը ունի իր ծիսական ծառը, որ պատրաստուած կ'ըլլայ փուշերէ, նուռէ, հացահատիկներէ (աղանձ, խաշիլ, փոխինձ): Ազգագրագէտին համաձայն, ոչ միայն եկեղեցին, այլ նաեւ տունը ունի տիեզերական խորհուրդ եւ բոլոր հայ ընտանիքները պէտք է պատրաստեն ծիսական այս ծառը: Հետաքրքրական է փուշի ընտրութիւնը, Ագուլեցիի բացատրութեամբ, «սէրը փշոտ է. սիրոյ համար պէտք է պայքարիլ, ի հարկին՝ զոհողութիւններու երագ, եւ քանի որ մարդը բնական էակ է, ան կրնայ ճիշդ ընտրութիւն կատարել»:

Մեր Կեանքը Դիրացնող 12 Օգտակար Խորհուրդներ

- Ապրիր այսօրը, քանի որ երեկը արդէն չկայ, իսկ վաղը կրնայ չըլլալ...
- Հասկնալի չէ՝ հարցուր:
- Հանեցար՝ ըսէ՛:
- Կ'ուզես հանդիպիլ՝ հրաւիրէ՛:
- Բան մը կը ցանկաս՝ խնդրէ՛:
- Կ'ուզես հասկնալի դառնալ՝ բացատրէ՛:
- Եթէ յանցաւոր ես, ընդունի՛ր, արդարացումներ մի՛ փնտռեր:
- Անխելք մարդոց հետ մի՛ յարաբերիր:
- Կեանքի մէջ ամենակարեւոր բանը սէրն է:
- Ձգտի՛ր ամէն ինչէ հաճոյք քաղել:
- Մի՛ շտ յիշէ, որ երկրորդ կեանք մը պիտի չունենաս:
- Վայելքի համար գումար մի՛ խնայեր:



www.armenianprelacykw.org

Քրիստիան Տիորի Անժամանցելի Խորհուրդները

Ֆրանսացի անուանի ձեռագետը Քրիստիան Տիոր ստեղծագործած է 50-ական թուականներուն, բայց անոր խորհուրդները կը մնան այժմեական մինչեւ օրս: Վարպետը յեղափոխութիւն կատարեց նորաձեւութեան աշխարհէն ներս. ծանր պատերազմական տարիներէն ետք ան կիներուն վերադարձուց վայելչութիւն եւ նորաձեւութեան աշխարհին մէջ իր դրոշմը ձգեց: Դրոշմ մը, որուն շնորհիւ անոր նորաձեւութեան տունը կը գոյատեւէ մինչեւ այսօր:

Ծանօթանանք մեծ վարպետին խորհուրդներուն

– Վայելչութիւնը մի՛ շտ պարզութիւն է:

– Որակը ոճի հիմքն է:

– Վայելուչ կիներ ան չէ, որ կուրօրէն կը հետեւի նորաձեւութեան: Եթէ նորաձեւութիւնը ձեզի չի յարմարիր, պարզապէս անտեսեցէք զայն:

– Աքսեսուարները չափազանց կարելոր են: Անոնք մեծ դեր ունին կնոջ վայելչութեան մէջ: Նոյն հագուստին հետ տարբեր արքեսուարներ կրելով, կիներ կրնայ դիւրաւ փոխել իր կերպարը:



– Վարդագոյնը նուրբ գոյն է, իսկ մոխրագոյնը դասական է եւ անժամանցելի:

– Կօշիկները շատ կարելոր են, կնոջ վայելչութեան իսկական ապացոյցն այն է, թէ ան ինչ կը կրէ իր ոտքերուն:

– Կիները աւելի եւս հրապուրիչ են 35-40 տարեկանին:

– Անուշահոտը կրնայ աւելի շատ բան պատմել կնոջ մասին, քան՝ անոր ձեռագիրը:

– Անհատականութիւնը եւ արտասովորութիւնը տարբեր հասկացողութիւններ են:

– Իմ յղացած հագուստներս իմ կեանքս են, անոնցմով ես ամէն օր կ'ապրիմ, կը շնչեմ, կ'ուրախանամ:

www.aztarar.com

ԱԻԱՆԴԱԿԱՆ ՔԵՐՄԷՍ

2017

ՍԻՐԵԼԻ ԸՈՒԷՅԹԱՅԱՅԵՐ,

ԲՈԼՈՐԴ ՀՐԱԻՐՈՒԿՑ ԷՔ ՄԻԱՍՆԱՔԱՐ ՎԱՅԵԼԵԼՈՒ ԵՐԵՔ ՕՐԵՐՈՒ
ԸՆԹԱՑԶԻՆ

23-24-25 ՓԵՏՐՈՒԱՐ 2017

ԱՆԱԿԸՆԿԱԼՆԵՐ

ՀԱՄԱԴԱՄ ՃԱՇԵՐ ՈՒ ԱՆՈՒՇԵՂԷՆՆԵՐ

ՉՈՒԱՐՃԱԼԻ ԽԱՂԵՐ

ՀԱՅԱԲՈՅՐ ՄԹՆՈԼՈՐՑ

ՆԱԵՒ ԴԻՏԻ ՎԱՅԵԼԵՆՔ

23 ԵՒ 24 ՓԵՏՐՈՒԱՐԻՆ

ԼԻԲԱՆԱՆԵՆ ՑԱՏՈՒԿ ԺԱՄԱՆԱԾ

ՍԻՐՈՒԿՑ ԵՐԳԻՉ՝

ՅԱԿՈՒԲ ՄԿՐՏԻՉԵԱՆ

մանրամասնությունները յառաջիկային

